



**PERUTUSAN DATUK BANDAR  
MESYUARAT MAJLIS BIL. 5/2022  
30 MEI 2022 (28 SYAWWAL 1443H)**

**BISMILLAHIRRAHMANIRRAHIM**

Assalamualaikum WBT dan Salam Sejahtera.

1. Alhamdulillah segala puji dan syukur dipanjatkan ke hadrat Allah SWT, di atas segala limpah kurnia dan inayah-Nya yang diberikan kepada kita semua. Saya berharap agar semua Ahli Majlis, Ketua Jabatan, pegawai-pegawai dan warga kerja Majlis sentiasa bersama-sama saya dalam memberikan kerjasama dan komitmen kepada Majlis bagi memastikan program dan aktiviti yang dirancang dapat dilaksanakan dengan jayanya.

Untuk itu, saya menyeru semua warga MBPJ, untuk mempergiat segala daya dan usaha bagi memastikan kesinambungan pelaksanaan strategi dan program-program yang telah dirancang. Majlis juga menyahut seruan Kerajaan Negeri Selangor untuk memekarkan kerjasama strategik dengan pemegang taruh (*stakeholders*) Majlis bagi memurnikan iltizam dalam melaksanakan program dan projek untuk kesejahteraan rakyat.

Sebagai organisasi yang berteraskan perkhidmatan, Majlis perlu sentiasa prihatin dan peka terhadap keperluan dan ekspektasi penduduk khususnya penduduk Petaling Jaya. Justeru itu, saya berharap agar perkhidmatan yang diberi kepada pelanggan Majlis adalah yang terbaik dan secara langsung mencerminkan kualiti,

ketelusan dan kecekapan sistem penyampaian perkhidmatan secara keseluruhannya.

Tuan-tuan dan puan-puan yang dihormati sekalian,

2. Suruhanjaya Pencegahan Rasuah Malaysia mengambil serius terhadap keputusan skor dan kedudukan Malaysia dalam Indeks Persepsi Rasuah (CPI) yang dikeluarkan oleh *Transparency International Malaysia* pada Januari 2022 yang lalu.

Berdasarkan indeks Persepsi Rasuah tersebut, kedudukan Malaysia dilihat kurang memberangsangkan sejak kebelakangan ini dan ia merupakan isyarat penting untuk kita bersama-sama menanganinya. Kedudukan Malaysia dalam CPI 2021 jatuh ke tangga 62 daripada keseluruhan 180 negara berbanding tangga 57 pada 2020, manakala skor Malaysia turun kepada 48 berbanding 51 pada 2020. Ia berdasarkan tahap persepsi rasuah dalam sektor awam negara dengan mengikut skala 0 (paling korup) hingga 100 (paling bersih).

Antara sebab kemerosotan skor adalah tindakan yang sangat terhad daripada kerajaan dalam membendung aktiviti rasuah politik dan mengukuhkan hak asasi manusia di Malaysia. Oleh yang demikian, sebagai penjawat awam adalah penting untuk mengamalkan sikap integriti, jujur dan telus tidak kira dalam melaksanakan apa jua tugas yang diamanahkan atau dalam menjalani kehidupan seharian. Ini kerana kegagalan untuk mengawal diri bukan sahaja akan memberi kesan kepada diri sendiri malah kepada ahli keluarga dan mereka yang berada di sekeliling kita.

Sehubungan itu, Majlis mengambil pendekatan awal dengan pihak berkepentingan dan pemegang taruh melalui **Program Integriti Bersama Peniaga Dan Sentiasa Mengamalkan Etika Perniagaan**

yang telah dijalankan bersempena program Raya@PJ pada 20 Mei lalu. Majlis akan melaksanakan program-program yang berkaitan dengan pihak berkepentingan dari semasa ke semasa. Moga-moga usaha dan iltizam Majlis dapat memupuk nilai murni dan berintegriti di kalangan peniaga yang dapat membawa kebaikan untuk Majlis dan masyarakat umum.

Tuan-tuan dan puan-puan yang dihormati sekalian,

3. Saban tahun, Majlis Bandaraya Petaling Jaya akan menyambut sambutan Hari Bandar Raya pada tanggal 20 Jun. Detik dan waktu ketika diisyiharkan status bandar raya masih kekal dan segar di minda masyarakat Petaling Jaya.

Seiring dengan kepesatan pembangunan global, MBPJ terus bergerak maju kehadapan. Pelbagai anugerah, kejayaan dan pengiktirafan diterima dan diraih sama ada dalam negara maupun peringkat global menjadi mercu tanda aras kecemerlangan bahawa Majlis kekal fokus dan beriltizam untuk membangunkan bandar raya Petaling Jaya sebagai bandar raya pintar dan berdaya tahan.

Selama 15 tahun memegang status bandar raya, pelbagai cabaran dan rintangan telah ditempuh dalam usaha menjayakan misi dalam Melaksanakan Agenda Perbandaran Pintar, Mampan, Berdaya Tahan, Dinamik Menerusi Tadbir Urus Cekap, Berkesan dan Peduli Komuniti dan visi Petaling Jaya Ke Arah Bandaraya Pintar, Mampan, Berdaya Tahan dan Dinamik Menjelang 2025.

Kini telah memasuki tahun ke-16 menggalas gelaran tersebut, Majlis Bandaraya Petaling Jaya tekad untuk terus komited dalam menyediakan dan menawarkan perkhidmatan terbaik serta

pembangunan mampan dalam memenuhi aspirasi penduduk setempat yang tinggi.

Mengambilkira negara kini berada dalam fasa peralihan endemik COVID-19 dan fokus perlu diberikan kepada peranan dan tanggungjawab semua pihak untuk memulihkan dan memacu semula ekonomi khusunya di Petaling Jaya, “**Merangsang Ekonomi, Mensejahterakan Komuniti**” dan berslogarkan “**PJKita Memacu Daya Gemilang**” diangkat sebagai tema sambutan pada edisi kali ini.

Majlis sentiasa memfokuskan kepentingan dan kesejahteraan masyarakat termasuk perkhidmatan dari segi pengurusan seperti sisa pepejal, perkhidmatan kebersihan, keindahan dan kelestarian landskap, penyediaan kemudahan dan infrastruktur awam selain keharmonian komuniti dan kejiranan melalui platform Majlis Perwakilan Penduduk dan rukun tetanga.

Dalam usaha menjadikan Petaling Jaya ke arah menjadi bandar raya lebih sejahtera, makmur dan berdayahuni, pelbagai program dan aktiviti sedia ada oleh jabatan-jabatan Majlis dengan kerjasama persatuan kakitangan, agensi kerajaan, badan bukan kerajaan (NGO), institusi pendidikan, kewangan, kesihatan, pihak swasta dan komuniti setempat akan diadakan sepanjang bulan Jun 2022 akan datang.

Tuan-tuan dan puan-puan yang dihormati sekalian,

4. Majlis Bandaraya Petaling Jaya terus berusaha memperkasakan Pelan Strategik PJSSR 2030 yang merupakan nadi utama pembangunan Petaling Jaya pada masa hadapan. Hasrat ini telah diterjemahkan melalui penetapan *Key Performance Indicator* (KPI) dan 10 *Thematic Projects* yang menjadi fokus utama di dalam setiap aspek perancangan

pembangunan bandar. Kesinambungan daripada itu, Majlis telah memperkenalkan Program PKKPJ sejak tahun 2011 yang merupakan usaha berterusan Majlis untuk menjadikan Petaling Jaya sebagai sebuah bandar raya yang *Safe and Resilient City*. Program ini juga bertujuan untuk menggalakkan penglibatan komuniti, mengeratkan komunikasi dua hala penduduk bersama Majlis serta meningkatkan tahap kesedaran keselamatan di kalangan warga Petaling Jaya. Pelaksanaan program ini juga dilihat memberikan impak yang sangat baik dan telah diukur keberkesanannya melalui beberapa indikator yang telah ditetapkan iaitu aspek peningkatan penglibatan penduduk, bilangan rondaan keselamatan, peningkatan kesedaran keselamatan kejiranan serta peranan kumpulan sasar yang dikenalpasti.

Sehubungan dengan itu, bagi memastikan kesinambungan kepada program PKKPJ yang telah berjaya dilaksanakan, Majlis mempelawa Persatuan Penduduk, Rukun Tetangga dan Badan Pengurusan Bersama (JMB) di kawasan perumahan kos rendah untuk mengemukakan permohonan bagi tahun 2022 tertakluk kepada syarat-syarat yang telah ditetapkan. Permohonan ini dibuka mulai hari ini, 30 Mei 2022 sehingga 10 Jun 2022 (Jummat). Semua syarat dan panduan permohonan boleh didapati secara atas talian melalui pautan portal <http://pkkpj.mbpj.gov.my/login.html>.

Tuan-tuan dan puan-puan yang dihormati sekalian,

5. Majlis Bandaraya Petaling Jaya kini sedang berusaha menjalankan kerja-kerja naik taraf lampu jalan di seluruh kawasan Petaling Jaya. Kerja naik taraf itu adalah menggunakan jenis diod pemancar cahaya (LED) sebagai sebahagian projek penggantian lampu di bandar ini.

Penggunaan lampu jenis LED yang lebih terang dan cerah ini dapat memberikan manfaat yang banyak dan kegunaan. Antara kelebihan lampu LED adalah penjimatan tenaga, jangka hayat yang panjang dan meningkatkan lagi tahap keselamatan pengguna jalan raya. Jumlah keseluruhan lampu jalan di bawah seliaan MBPJ sehingga tahun 2021 adalah sebanyak 17,600 unit. Daripada jumlah tersebut, 9,953 unit lampu telah digantikan kepada LED pada tahun tersebut.

Bagi tahun 2022, Majlis telah menasarkan sebanyak 1,491 unit lampu jalan dinaiktaraf kepada LED sehingga penghujung tahun ini. Ini menjadikan baki lampu yang belum dinaiktaraf menjelang awal tahun hadapan adalah sebanyak 5,154 unit lampu iaitu bersamaan dengan 31 peratus (%) belum ditukarkan kepada LED.

MBPJ menjangkakan lampu jalan MBPJ akan mencapai 100% LED dalam tempoh 3 tahun mengikut peruntukan yang diterima melalui peruntukan Majlis, MARRIS dan Program Bandar Selamat. Dalam tempoh tersebut, Majlis melalui Jabatan Kejuruteraan akan memfokuskan kepada penggantian lampu kepada jenis LED dan kerja-kerja pembaikan kecil (mengikut keperluan di tapak) yang akan memberi kesan kepada pencahayaan lampu.

Untuk makluman, Majlis sedang menyiapkan kerja-kerja menaik taraf LED di Lorong Utara Kecil (berhampiran Kompleks Sukan Astaka) yang bermula pada 8 Mac 2022. Dalam pada yang masa yang sama, kerja naik taraf lampu LED sedang dilakukan di Taman Tasik Komuniti Kelana Jaya yang dijangka siap pada 31 Mei 2022. Berikut adalah kawasan seterusnya yang akan dinaik taraf kepada lampu LED:

- a) Jalan 17/21, Jalan 5/46 dan Jalan Cempaka.
- b) Persiaran Meranti, Persiaran Margosa, Persiaran Industri, Jalan PJU 7/1, Jalan PJU 7/7 Dan Jalan PJU 7/15.
- c) Jalan PJS 1/15, Jalan Sri Manja, Jalan PJS 1/35, Jalan PJS 1/50 Dan Jalan PJS 1/52.
- d) Jalan PJS 1/14, Jalan PJS 1/17, Jalan PJS 1/21, Jalan PJS 1/21a, Jalan Maju Jaya 2, Jalan Maju Jaya 5 dan Jalan Maju Jaya 9.
- e) Jalan Pekaka 8/1, Jalan Pekaka 8/2, Jalan Pekaka 8/3, Jalan Pekaka 8/4, Jalan Pekaka 8/5, Jalan Pekaka 8/6, Persiaran Mahogani dan Jalan Teknologi.
- f) Jalan PJU 3/22, Jalan PJU 3/31, Persiaran Tropicana, Jalan Tropicana Selatan, Jalan TR 2/1, Jalan TR 2/2, Jalan TR 2/3, Jalan TR 2/4, Jalan TR 2/5, Jalan TR 9/1, Jalan TR 9/2, Jalan TR 9/3, Jalan TR 9/4, Jalan TR 9/5, Jalan TR 9/6, Jalan TR 9/7, Jalan TR 9/8 dan Jalan TR 9/9.
- g) Jalan PJU 1A/1, Jalan PJU 1A/5, Jalan PJU 1A/19, Jalan PJU 1A/25, Jalan PJU 1A/25A, Jalan PJU 1A/25B, Jalan PJU 1A/25C, Jalan PJU 1A/25D, Jalan PJU 1A/25E, Jalan PJU 1A/27, Jalan PJU 1A/27A, Jalan PJU 1A/27B, Jalan PJU 1A/27C, Jalan PJU 1A/27D, Jalan PJU 1A/27E, Jalan PJU 1A/27F, Jalan PJU 1A/27G, Jalan PJU 1A/29, Jalan PJU 1A/29A, Jalan PJU 1A/29B dan Jalan PJU 1A/29C.

Tuan-tuan dan puan-puan yang dihormati sekalian,

6. Sebagai inisiatif bagi mengatasi masalah kekurangan Tempat Letak Kereta (TLK) *On-street* di seksyen 52 Petaling Jaya, dua kaedah pelaksanaan telah dilaksanakan seperti berikut:

### **Menawarkan Kadar Caj Yang Menarik Minat Pengguna**

- a) Bagi menarik minat pengunjung untuk meletakkan kenderaan di Kompleks A dan Kompleks C, Majlis telah melaksanakan kadar caj letak kereta '**Percuma Untuk 1 Jam Pertama**' di kedua-dua kompleks letak kereta tersebut bermula 25 April 2022 yang lalu. Kadar sedia ada RM1.50 bagi jam kedua dan seterusnya adalah terpakai.
- b) Pelaksanaan *parking* 1 jam percuma yang ditawarkan oleh Majlis kepada orang awam di Kompleks Letak Kereta Seksyen 52 Petaling Jaya ini telah mendapat sambutan yang baik daripada orang awam dengan jumlah peningkatan pengguna harian kompleks letak kereta sebanyak 14.2 peratus.

### **Menempatkan Kakitangan Majlis Untuk Meletakkan Kenderaan Di TLK *Off-street***

- a) Kakitangan Majlis yang menggunakan TLK *On-street* akan ditempatkan ke TLK kakitangan di kawasan Ibu pejabat MBPJ, Kompleks A dan Kompleks C. Penempatan TLK ini akan meningkatkan jumlah penawaran petak letak kereta sedia ada *On-street* sebanyak 13 peratus kepada pengguna awam di Seksyen 52.

Tuan-tuan dan puan-puan yang dihormati sekalian,

7. Jumlah kes demam denggi yang dilaporkan pada minggu ke 20/2022 (15/05/2022 - 21/05/2022) adalah sebanyak 144 kes, menjadikan jumlah kumulatif sebanyak 1472 kes yang dilaporkan. Keadaan ini meningkat sebanyak 136 peratus daripada jumlah kes pada minggu sebelumnya iaitu 61 kes.

Jumlah lokaliti wabak juga menunjukkan peningkatan daripada 27 lokaliti kepada 44 lokaliti, iaitu 6 wabak baru, 29 lokaliti wabak terkawal, 3 lokalitii wabak tak terkawal dan 6 lokaliti wabak *hotspot* dicatatkan. Tiada kes kematian baru yang dilaporkan.

Bagi pemeriksaan kebersihan dan keceriaan tandas awam pula, ianya dilakukan secara aktif dan berkala mengikut keperluan oleh pegawai pemeriksa yang telah diberi kuasa oleh PBT yang bertanggungjawab menjalankan pemeriksaan dan penarafan “*star rating*”. Tandas awam akan digredkan dengan menggunakan borang pemeriksaan / penggredan tandas awam yang telah dikeluarkan seperti di dalam garis panduan penggredan tandas awam oleh pihak Kementerian Perumahan dan Kerajaan Tempatan (KPKT). Sijil pengiktirafan diberikan kepada operator-operator yang mengendalikan kebersihan tandas awam mengikut markah yang telah dinilai seperti berikut :

PENGIKTIRAFAN	MARKAH (%)	BINTANG
Amat Bersih	91-100	★★★★★
Bersih	81-90	★★★★
Memuaskan	71-80	★★★
Sederhana Bersih	61-70	★★
Kurang Bersih	51-60	★

Pemeriksaan dan pengauditan tandas awam dilaksanakan bagi tujuan memantau kebersihan dan keselamatan selain menjaga imej Majlis Bandaraya Petaling Jaya. Tandas awam ini telah dikategorikan dalam 16 kategori premis antaranya ialah tandas awam milik PBT, tandas awam restoran, tandas awam pusat membeli belah, tandas awam stesen minyak dan sebagainya. Berikut ringkasan pemarkahan bagi penggredan tandas mengikut kategori bagi sepanjang bulan April 2022.

BIL.	KATEGORI	PENARAFAN BINTANG					JUMLAH	
		BIL. TANDAS						
		5*	4*	3*	2*	1*		
1.	Tandas Awam MBPJ	7	6	0	0	0	13	
2.	Pejabat Majlis	1	0	0	0	0	1	
3.	Dewan Serbaguna	0	1	0	0	0	1	
4.	Stesen Minyak	2	7	2	0	0	11	
5.	Sekolah	0	1	1	0	0	2	
6.	Pusat Beli Belah	5	0	0	0	0	5	
	JUMLAH KESELURUHAN						33	

**Sekian, terima kasih.**